

৮০- সূরা 'আবাসা<sup>(১)</sup>  
৪২ আয়াত, ১ রুকু', মক্কী



।। রহমান, রহীম আল্লাহর নামে ।।

১. তিনি ঙ্গকুধিত করলেন এবং মুখ ফিরিয়ে নিলেন<sup>(২)</sup>,
২. কারণ তাঁর কাছে অঙ্ক লোকটি আসল ।
৩. আর কিসে আপনাকে জানাবে যে, ---সে হয়ত পরিশুদ্ধ হত,

بِسْمِ اللَّهِ الرَّحْمَنِ الرَّحِيمِ  
عَبَسَ وَتَوَلَّى

أَنْ جَاءَهُ الْأَعْمَى

وَمَا يَذُرُّكَ لَعَلَّهُ يَؤْتَى

- (১) এ সূরাটি সাহাবী আবদুল্লাহ ইবনে উম্মে মাকতুম রাদিয়াল্লাহু 'আনহু এর সাথে বিশেষভাবে জড়িত । তাঁর মা উম্মে মাকতুম ছিলেন খাদীজা রাদিয়াল্লাহু 'আনহা এর পিতা খুওয়াইলিদের সহোদর বোন । তিনি ছিলেন নবী সাল্লাল্লাহু আলাইহি ওয়া সাল্লামের শ্যালক । বংশ মর্যাদার দিক দিয়ে সমাজের সাধারণ শ্রেণীভুক্ত নন বরং অভিজাত বংশীয় ছিলেন । আবদুল্লাহ রাদিয়াল্লাহু 'আনহু অঙ্ক হওয়ার কারণে জানতে পারেননি যে, রাসূলুল্লাহ সাল্লাল্লাহু আলাইহি ওয়া সাল্লাম অন্যের সাথে আলোচনারত আছেন । তিনি মজলিসে প্রবেশ করেই রাসূলুল্লাহ সাল্লাল্লাহু আলাইহি ওয়া সাল্লামকে আওয়াজ দিতে শুরু করেন এবং বার বার আওয়াজ দেন । কোন কোন বর্ণনায় এসেছে যে, তিনি রাসূলুল্লাহ সাল্লাল্লাহু আলাইহি ওয়া সাল্লামকে কুরআন এর একটি আয়াতের পাঠ জিজ্ঞাসা করেন এবং সাথে সাথে জওয়াব দিতে পীড়াপীড়ি করেন । রাসূলুল্লাহ সাল্লাল্লাহু আলাইহি ওয়া সাল্লাম তখন মক্কার কাফের নেতৃবর্গের সাথে আলোচনায় মশগুল ছিলেন । এই নেতৃবর্গ ছিলেন ওতবা ইবনে রবীয়া, আবু জাহল ইবনে হিশাম এবং রাসূলুল্লাহ সাল্লাল্লাহু আলাইহি ওয়া সাল্লাম এর পিতৃব্য আব্বাস । তিনি তখনও মুসলিম হননি । এরূপ ক্ষেত্রে আবদুল্লাহ ইবনে উম্মে মাকতুম রাদিয়াল্লাহু 'আনহু এর এভাবে কথা বলা এবং মামুলী প্রশ্ন নিয়ে তাৎক্ষনিক জওয়াবের জন্য পীড়াপীড়ি করা রাসূলুল্লাহ সাল্লাল্লাহু আলাইহি ওয়া সাল্লাম এর কাছে বিরক্তিকর ঠেকে । এই বিরক্তির প্রধান কারণ ছিল এই যে, আবদুল্লাহ রাদিয়াল্লাহু 'আনহু পাক্কা মুসলিম ছিলেন এবং সদা সর্বদা মজলিসে উপস্থিত থাকতেন । তিনি এই প্রশ্ন অন্য সময়ও রাখতে পারতেন । তাঁর জওয়াব বিলম্বিত করার মধ্যে কোন ধর্মীয় ক্ষতির আশংকা ছিল না । কিন্তু আল্লাহ তা'আলা নবীর এ বিরক্তি প্রকাশ পছন্দ করলেন না । তিনি আয়াত নাযিল করে তার প্রতিকার করেন । [দেখুন: তিরমিযী: ৩৩২৮, ৩৩৩১, মুয়াত্তা মালেক: ১/২০৩]

- (২) عبس শব্দের অর্থ রুষ্ঠতা অবলম্বন করা এবং চোখে মুখে বিরক্তি প্রকাশ করা । تولى শব্দের অর্থ মুখ ফিরিয়ে নেয়া । [জালালাইন]

৪. অথবা উপদেশ গ্রহণ করত, ফলে সে  
উপদেশ তার উপকারে আসত<sup>(১)</sup> ।
৫. আর যে পরোয়া করে না,
৬. আপনি তার প্রতি মনোযোগ  
দিয়েছেন ।
৭. অথচ সে নিজে পরিশুদ্ধ না হলে  
আপনার কোন দায়িত্ব নেই,
৮. অপরদিকে যে আপনার কাছে ছুটে  
এলো,
৯. আর সে সশঙ্কচিত্ত,
১০. আপনি তার থেকে উদাসীন হলেন;
১১. কখনো নয়, এটা তো উপদেশ  
বাণী<sup>(২)</sup>,
১২. কাজেই যে ইচ্ছে করবে সে এটা  
স্মরণ রাখবে,
১৩. এটা আছে মর্যাদা সম্পন্ন লিপিসমূহে
১৪. যা উন্নত, পবিত্র<sup>(৩)</sup>,

أَوَيَّدَكَ فَتَنَّفَعَهُ الذِّكْرَى ۝

أَمَّا مَنْ اسْتَعْتَى ۝

فَأَنْتَ لَهُ تَصَدَّى ۝

وَمَا عَلَيْكَ الْأَلْبُرَى ۝

وَأَمَّا مَنْ جَاءَكَ يَسْعَى ۝

وَهُوَ يَخْشَى ۝

فَأَنْتَ عَنْهُ تَلَهَى ۝

كَلَّا إِنَّهَا تَذْكِرَةٌ ۝

فَمَنْ شَاءَ ذَكُرْهُ ۝

فِي صُحُفٍ مُّكْرَمَةٍ ۝

مَرْفُوعَةٍ مُّطَهَّرَةٍ ۝

- (১) অর্থাৎ আপনি কি জানেন এই সাহাবী যা জিজ্ঞেস করেছিল তা তাকে শিক্ষা দিলে সে তা দ্বারা পরিশুদ্ধ হতে পারত কিংবা কমপক্ষে আল্লাহ তা'আলাকে স্মরণ করে উপকার লাভ করতে পারত । [দেখুন, মুয়াসসার; সা'দী]
- (২) অর্থাৎ এমনটি কখনো করবেন না । যে সব লোক আল্লাহকে ভুলে আছে এবং যারা নিজেদের দুনিয়াবী সহায়-সম্পদ ও প্রভাব-প্রতিপত্তির অহংকারে মত্ত হয়ে আছে, তাদেরকে অযথা গুরুত্ব দিবেন না । ইসলাম, অহি বা কুরআন এমন কিছু নয় যে, যে ব্যক্তি তার থেকে মুখ ফিরিয়ে থাকে তার সামনে নতজানু হয়ে তা পেশ করতে হবে । বরং সে সত্যের যতটা মুখাপেক্ষী নয় সত্যও তার ততটা মুখাপেক্ষী নয় । বরং তাদেরই ইসলামের মহত্ত্বের সামনে নতজানু হতে হবে । [তাতিমাতু আদওয়াউল বায়ান]
- (৩) مكرمة অর্থ সম্মানিত, মর্যাদাসম্পন্ন । مرفوعة বলে এর মর্যাদা অনেক উচ্চ-তা বোঝানো হয়েছে । [ইবন কাসীর] আর مطهرة বলে বোঝানো হয়েছে হাসান বসরীর

১৫. লেখক বা দূতদের হাতে<sup>(১)</sup> ।

يَأْيِدِي سَفَرَةٍ ۝

১৬. (যারা) মহাসম্মানিত ও নেককার ।

كِرَامٍ بَرَرَةٍ ۝

১৭. মানুষ ধ্বংস হোক! সে কত অকৃতজ্ঞ<sup>(২)</sup>!

فَتِيلَ الْإِنْسَانِ مَا أَكْفَرًا ۝

১৮. তিনি তাকে কোন বস্তু থেকে সৃষ্টি করেছেন?

مِنْ أَيِّ شَيْءٍ خَلَقَهُ ۝

১৯. শুক্রবিন্দু থেকে, তিনি তাকে সৃষ্টি করেন, পরে তার পরিমিত বিকাশ সাধন করেন<sup>(৩)</sup>,

مِنْ نُطْفَةٍ خَلَقَهُ فَقَدَّرَهُ ۝

মতে, যাবতীয় নাপাক থেকে পবিত্র। সুদী বলেন, এর অর্থ কাফেররা এটা পাওয়ার অধিকারী নয়। তাদের হাত থেকে পবিত্র। হাসান থেকে অপর বর্ণনায় বলা হয়েছে, এর অর্থ মুশরিকদের উপর নাযিল হওয়া থেকে পবিত্র। [কুরতুবী] ইবন কাসীর বলেন, এর অর্থ এটি বাড়তি-কমতি ও অপবিত্রতা থেকে পবিত্র ও মুক্ত।

(১) سفره শব্দটি سافر এর বহুবচন হতে পারে। তখন অর্থ হবে লিপিকার বা লেখক। আর যদি سفره শব্দটি سفارة থেকে আসে, তখন এর অর্থ দূতগণ। এই শব্দ দ্বারা ফেরেশতা উদ্দেশ্য হতে পারে, আবার রাসূলুল্লাহ সাল্লাল্লাহু আলাইহি ওয়াসাল্লামের সাহাবীদেরও উদ্দেশ্য হতে পারে। প্রথমটিই অধিক শুদ্ধ। সহীহ হাদীসে এ السَّفَرَةُ الْكِرَامُ الْبَرَرَةُ এর তাফসীর ফেরেশতাদেরই উদ্দেশ্য নেয়া হয়েছে। রাসূলুল্লাহ সাল্লাল্লাহু আলাইহি ওয়া সাল্লাম বলেনঃ 'কেরাআতে বিশেষজ্ঞ কুরআন পাঠক সম্মানিত নেককার দূতদের (ফেরেশতাদের) সাথে থাকবে আর যে ব্যক্তি বিশেষজ্ঞ নয় কিন্তু কষ্টে সৃষ্টে পড়ে সে দ্বিগুণ সওয়াব পাবে। [বুখারী: ৪৯৩৭, মুসলিম: ৭৯৮] [ইবন কাসীর]

(২) এর অর্থ, সে কত বড় সত্য-অস্বীকারকারী। তাছাড়া এ আয়াতের আর একটি অর্থ হতে পারে। অর্থাৎ "কোন জিনিসটি তাকে সত্য অস্বীকার করতে উদ্বুদ্ধ করেছে?" [তবারী]

(৩) অর্থাৎ সুপরিমিত করেছেন, তার গঠন-প্রকৃতি, আকার-আকৃতি সুপরিমিতভাবে সৃষ্টি করেছেন। سفره শব্দের এরূপ অর্থও হতে পারে যে, মানুষ যখন মাতৃগর্ভে সৃষ্টি হতে থাকে তখন আল্লাহ তা'আলা তার কাজ, বয়স, রিযিক, ভাগ্য ইত্যাদি তকদীর নির্দিষ্ট করে দিয়েছেন। তাছাড়া পূর্ব থেকেই প্রতিটি মানুষের জন্য নির্দিষ্ট করা আছে তার গায়ের রং কি হবে, সে কতটুকু উঁচু হবে, তার দেহ কতটুকু কি পরিমাণ মোটা ও পরিপুষ্ট হবে। এত সব সত্ত্বেও সে তার রবের সাথে কুফরী করে। [দেখুন, কুরতুবী]

২০. তারপর তার জন্য পথ সহজ করে  
দেন<sup>(১)</sup>;
২১. এরপর তার মৃত্যু ঘটান এবং তাকে  
কবরস্থ করেন।
২২. এরপর যখন ইচ্ছে তিনি তাকে  
পুনর্জীবিত করবেন<sup>(২)</sup>।
২৩. কখনো নয়, তিনি তাকে যা আদেশ  
করেছেন, সে এখনো তা পূর্ণ  
করেনি।
২৪. অতঃপর মানুষ যেন তার খাদ্যের প্রতি  
লক্ষ্য করে<sup>(৩)</sup>!

ثُمَّ السَّبِيلَ يَسَّرَهُ ۝

ثُمَّ أَمَاتَهُ فَأَقْبَرَهُ ۝

ثُمَّ إِذَا شَاءَ أَنشَرَهُ ۝

كَلَّا لَيَنبَغِيَنَّ مَا مَرَرَهُ ۝

فَلْيَنْظُرِ الْإِنْسَانُ إِلَى طَعَامِهِ ۝

- (১) অর্থাৎ আল্লাহ্ তা'আলা স্বীয় ক্ষমতা-বলে মাতৃগর্ভে মানুষকে সৃষ্টি করেন। তারপর তিনিই তার অপার শক্তির মাধ্যমে মাতৃগর্ভ থেকে জীবিত ও পূর্ণাঙ্গ মানুষের বাইরে আসার পথ সহজ করে দেয়। ফলে দেহটি সহী-সালামতে বাইরে চলে আসে এবং মায়েরও এতে তেমন কোন দৈহিক ক্ষতি হয় না। এছাড়া আয়াতের আরেকটি অর্থ হচ্ছে, দুনিয়ায় তিনি তার জন্য নিজের জন্য ভালো বা মন্দ, কৃতজ্ঞতা বা অকৃতজ্ঞতা আনুগত্য বা অবাধ্যতার মধ্যে সে কোন পথ চায় তা তার সামনে খুলে রেখে দিয়েছেন এবং পথ তার জন্য সহজ করে দিয়েছেন। ফলে সে শুকরিয়া আদায় করে সৎপথ গ্রহণ করতে পারে, আবার কুফরী করে বিপথে যেতে পারে। [দেখুন, ইবন কাসীর]
- (২) অর্থাৎ মৃত্যুর পর আল্লাহ্ তা'আলাই মানুষকে পুনরুজ্জীবিত করবেন। একমাত্র তিনিই এগুলো করার ক্ষমতা রাখেন। তারপরও মানুষ তাঁকে অস্বীকার করে, তাঁর হুকুম আদায় করে না। [সাদী] আবু হুরাইরা রাদিয়াল্লাহু 'আনহু বলেন, রাসূলুল্লাহ্ সাল্লাল্লাহু আলাইহি ওয়া সাল্লাম বলেছেন, দুই ফুৎকারের মধ্যবর্তী সময় হবে চল্লিশ। আবু হুরাইরা রাদিয়াল্লাহু 'আনহু সাথীরা বলল, চল্লিশ দিন? আবু হুরাইরা রাদিয়াল্লাহু 'আনহু বললেন, আমি এটা বলতে অস্বীকার করছি, তারা বলল, চল্লিশ বছর? তিনি বললেন, আমি এটা বলতেও অস্বীকার করছি। তারা বলল, তাহলে কি চল্লিশ মাস? তিনি বললেন, আমি এটাও বলতে অস্বীকার করছি। তবে মানুষের সবকিছু পঁচে যায় একমাত্র মেরুদণ্ডের নিম্নভাগের একটি ছোট্ট কোষ ব্যতীত। তার উপরই আবার সৃষ্টি জড়ো হবে।" [বুখারী: ৪৮১৪, মুসলিম: ২৯৫৫]
- (৩) মানবসৃষ্টির সূচনা উল্লেখ করার পর মানুষ যে খাদ্যের নেয়ামত ভোগ করে, এখানে সেগুলো সম্পর্কে আলোচনা করা হয়েছে। অর্থাৎ খাদ্য সম্পর্কে তার একবার চিন্তা

২৫. নিশ্চয় আমরা প্রচুর বারি বর্ষণ করি,  
 ২৬. তারপর আমরা যমীনকে যথাযথভাবে  
 বিদীর্ণ করি;  
 ২৭. অতঃপর তাতে আমরা উৎপন্ন করি  
 শস্য;  
 ২৮. আঙ্গুর, শাক-সব্জি,  
 ২৯. যায়তুন, খেজুরগাছ,  
 ৩০. অনেক গাছবিশিষ্ট উদ্যান,  
 ৩১. ফল এবং গবাদি খাদ্য<sup>(১)</sup>,  
 ৩২. এগুলো তোমাদের ও তোমাদের  
 চতুষ্পদ জন্তুদের ভোগের জন্য<sup>(২)</sup> ।  
 ৩৩. অতঃপর যখন তীক্ষ্ণ আওয়াজ  
 আসবে<sup>(৩)</sup>,  
 ৩৪. সেদিন মানুষ পালিয়ে যাবে তার  
 ভাইয়ের কাছ থেকে,

إِنَّا صَبَبْنَا الْمَاءَ صَبَابًا ۝

ثُمَّ شَفَقْنَا الْأَرْضَ شَقَاتًا ۝

فَأَنْبَتْنَا فِيهَا حَبًّا ۝

وَعِنَبًا وَقَضْبًا ۝

وَزَيْتُونًا وَنَخْلًا ۝

وَحَدَائِقَ غُلْبًا ۝

وَقَائِهَةً وَأَبًا ۝

مَتَاعًا لَّكُمْ وَلِأَنْعَامِكُمْ ۝

فَإِذَا جَاءَتِ الصَّاعَةُ ۝

يَوْمَ يَفِرُّ الْمَرْءُ مِنْ أَخِيهِ ۝

করা প্রয়োজন- কিভাবে এই খাদ্য উৎপন্ন হয়। আল্লাহ যদি এর উপকরণগুলো সরবরাহ না করতেন তাহলে কি জমি থেকে এই খাদ্য উৎপন্ন করার ক্ষমতা মানুষের ছিল? এসব নেয়ামতসমূহ তিনি মানুষকে দিয়েছেন যাতে মানুষ কিয়ামতের প্রস্তুতির জন্য এর সাহায্যে আল্লাহর ইবাদত করে। [কুরতুবী]

- (১) 'أَب' শব্দটির উপরোক্ত অর্থ ইবনে আব্বাস ও উমর রাদিয়াল্লাহু 'আনহুম থেকে সহীহ হাদীসে বর্ণিত হয়েছে। [সহীহ ইবনে খুযাইমাহ: ২১৭২]
- (২) অর্থাৎ কেবল তোমাদের জন্যই নয়, তোমাদের যেসব গবাদি-গৃহপালিত পশু রয়েছে, তাদের জন্যও। এসব নেয়ামতের দিকে দৃষ্টিপাত করলে মহান আল্লাহর ইবাদত, তার প্রতি শুকরিয়া আদায় করা ও তার নির্দেশাবলি মেনে চলার প্রয়োজনীয়তা ফুটে ওঠে।
- (৩) আয়াতে বর্ণিত الصاخة শব্দটির মূল অর্থ হলো, 'এমন কঠোর ডাক যার ফলে মানুষ শ্রবণশক্তি হারিয়ে ফেলে।' এখানে কিয়ামতের দ্বিতীয় শিংগাধ্বনির কথা বলা হয়েছে। যা পুনরুত্থানের শিক্ষায় ফুঁক দেয়া বোঝায়। এই বিকট আওয়াজ বুলন্দ হবার সাথে সাথেই মরা মানুষেরা জীবিত হয়ে উঠবে এবং কেয়ামতের মাঠে উপস্থিত হবে। [মুয়াসসার, জালালাইন]

৩৫. এবং তার মাতা, তার পিতা,  
 ৩৬. তার পত্নী ও তার সন্তান থেকে<sup>(১)</sup>,  
 ৩৭. সেদিন তাদের প্রত্যেকের হবে এমন  
 গুরুতর অবস্থা যা তাকে সম্পূর্ণরূপে  
 ব্যস্ত রাখবে<sup>(২)</sup>।  
 ৩৮. অনেক চেহারা সেদিন হবে উজ্জ্বল,  
 ৩৯. সহাস্য ও প্রফুল্ল,  
 ৪০. আর অনেক চেহারা সেদিন হবে  
 ধূলিধূসর  
 ৪১. সেগুলোকে আচ্ছন্ন করবে কালিমা।  
 ৪২. এরাই কাফির ও পাপাচারী।

وَأُمَّهُ وَآبِيهِ ۖ  
 وَصَاحِبَتَهُ وَبَنِيهِ ۗ  
 الْكُلَّ أَمْرًا مِنْهُمْ يَوْمَئِذٍ شَانٌ يُغْزِيهِ ۝  
 وَجُوهٌ يَوْمَئِذٍ مُسْرِرَةٌ ۖ  
 ضَاحِكَةٌ مُسْتَبْشِرَةٌ ۖ  
 وَجُوهٌ يَوْمَئِذٍ عَلَيْهَا غَبَرَةٌ ۖ  
 تَرْهَقُهَا قَتَرَةٌ ۖ  
 أُولَئِكَ هُمُ الْكٰفِرَةُ الْفٰجِرَةُ ۝

- (১) এখানে হাশরের ময়দানে সকলের সমাবেশের দিন বোঝানো হয়েছে, সেদিন প্রত্যেক মানুষ আপন চিন্তায় বিভোর হবে। সেদিন মানুষ তার অতি-নিকটাত্মীয়কে দেখলেও মুখ লুকাবে এবং পালিয়ে বেড়াবে। [ইবন কাসীর] প্রায় এই একই ধরনের বিষয়বস্তু বর্ণিত হয়েছে সূরা মা'আরিজের ১০ থেকে ১৪ পর্যন্ত আয়াতে।
- (২) প্রত্যেক মানুষ তার ভ্রাতার কাছ থেকে এবং পিতা মাতা স্ত্রী এবং সন্তানদের কাছ থেকে সেদিন মুখ লুকিয়ে ফিরবে। দুনিয়াতে পারস্পরিক সাহায্য ও সহযোগিতা ভ্রাতাদের মধ্যে হয়। এর চেয়ে বেশী পিতা-মাতাকে সাহায্য করার চিন্তা করা হয় এবং স্বভাবগত কারণে এর চেয়েও বেশী স্ত্রী এবং সন্তানদের সাথে সম্পর্ক স্থাপিত হয়। আয়াতে নীচ থেকে উপরের সম্পর্ক যথাক্রমে উল্লেখ করা হয়েছে। [কাতাদা: দেখুন, ইবন কাসীর] হাদীসে বলা হয়েছে, রাসূলুল্লাহ সাল্লাল্লাহু আলাইহি ওয়া সাল্লাম বলেছেন, “কিয়ামতের দিন সমস্ত মানুষ একেবারেই উলংগ হয়ে উঠবে। একথা শুনে তার পবিত্র স্ত্রীদের মধ্য থেকে কোন একজন ঘাবড়ে গিয়ে জিজ্ঞেস করেন, হে আল্লাহর রাসূল! আমাদের লজ্জাস্থান কি সেদিন সবার সামনে খোলা থাকবে? জবাবে রাসূলুল্লাহ সাল্লাল্লাহু আলাইহি ওয়া সাল্লাম এই আয়াতটি তেলাওয়াত করে বলেন, সেদিন অন্যের দিকে তাকাবার মতো হুঁশ ও চেতনা কারো থাকবে না। [নাসাঈ: ২০৮৩, তিরমিযী: ৩৩৩২, ইবনে মাজাহ: ৪২৭৬, মুসনাদে আহমাদ: ৬/৮৯]।